



Khuangchera section-in hnam lam an thiam ber

Branch News

Chanmari West, 11th August, 2013 : September ni 5-a CM Running Trophy in Cultural Dance Competition kan hmachhawn tur atana section-te inbuatsaihna leh intihsiakna chuan Ni 9.8.2013 (Zirtawp) zan khan a vawrtawp a thleng ta.

Zirtawp zan dar 7:00 khan Indoor Stadium-ah intihsiakna hi neih a ni. He hun hi Pu RL Thanhnuna, Organising Comt Chairman-in a kaihruai a, Tv Zairemmawia, Secy CWBYMA hnen atangin report tawifel tak ngaihthlak a ni a, Pu C Lalzarliana, CWBYMA President-chuan tawifel takin he intihsiak hi a hawng. Kar leh maia intihsiak tura inbuatsaih mek Branch YMA Zaipawl hnen atangin zai mawi tak ngaihthlak zui nghal a ni.

Intihsiak tan a ni a, Taitesena Section-in Chaiin bul an tan a, Khuangchera section-in Khuallam in hnu an khar. He intihsiak hi veng mipuiin kan hlut hle, kut bengalawm au thawm a tha thei khawp mai. Art & Culture Dept atanga endik tura sawmte uluk takin kan intihsiak hi min endik a, endiktute chungah Branch YMA chuan lawmthu a sawi. He intihsiaknaa rawn tel zawng zawngte chungah hian Branch chuan lawmthu a sawi

a, CM Running Trophy-ah theihtawp chhuaha lam ngei turin a beisei bawk.

Hetiang hi intihsiak result chu a ni.

CHAI

1	Khuangchera	361
2	Taitesena	340
3	Vanapa	339
4	Chawngbawla	334
5	Neuva	334

KHUALLAM

1	Khuangchera	356
2	Vanapa	339
3	Neuva	338
4	Chawngbawla	338
5	Taitesena	

OVERALL

1	Khuangchera	717
2	Vanapa	678
3	Neuva	672
4	Chawngbawla	672
5	Taitesena	340

Branch YMA Zaipawl ngawrh takin an inbuatsaih

August Ni 13 atanga tan tur Pu Rukunga hlate hmanga Branch YMA zaipawl intihsiaknaa tel turin Chanmari West Branch YMA Zaipawlte chu theih tawpin an inbuatsaih mek zel a. Tunah hian Zaipawl hi mipa 25, hmeichhia 17 leh conductor 3 an ni mek. Kar kalta chhung khan Camp neiin zing leh zanah hla an zir thin a, tunkar chhung hian zan lamah Pu VL Thakima, Pu R Lalhmachhuana, Pu T Bualzika leh Pu F Rosiamliana te inah hla an zir a, Inrinni khan nilengin Pu Lalrinliana inah hla hi an zir leh a ni. Hla zir nana phal taka an in hmantirtute chungah Branch YMA chuan lawmthu a sawi.

CWBYMA Zaipawl hi August ni 14 chawhma lam hian Central YMA Hall, Tuikhuahlang ah an zai ang. He intihsiakna atana inbuatsaih chhung zawnga Zaipawlte tanpuina petu leh a tul apianga buaipuitute chungah Branch YMA chuan lawmthu a sawi tak zet a ni.

☀ Ni 3.8.2013 (Inrinni) khan Hollow Guitar thar Rs.5200/ man mitthi lumen zan leh YMA Function pawimawha hman tur lei a ni.

☀ Ni 3.8.2013 (Inrinni) khan Central YMA Programme Rangvamual leh Phunchawnga Operation neihah member 15 te Phunchawngah Duty a ni.

☀ Central YMA buatsaih Branch zaipawl intihsiakah ni 14.8.2013 (Nilaini) dar 12:00 hian Chanmari West Branch Zaipawlte an zai dawna, intihsiakna hmun tur hi Central YMA Hall Tuikhuahlangah a ni.

☀ Silver Jubilee Fund chhungtinah Branch leh Section hruaituten an khawn mek a, chhungtinte tlawmngaia lo pe zel turin an ngen a, Collector ten mahni awmna Branch OB Convener hnenah khawn hmuh sa theh luh zel tur a ni

☀ Vengchhung Information Mike tha lote Property Sub-committee ten ni 3-4.8.2013 (Inrinni leh Pathianni) khan an siam a, tha lo lai a la awm a nih chuan Property hruaitute hnenah hriattir thin tur a ni e.

AWM THAR

1. Pu M.Zoliana te chhung member 5, N.E.Tlangnuam atangin Pu H.Vanhang in T-Section-ah.
2. Tv Lalbiakkima Zawngin atangin Pu Kawlzika (L) in T-Section-ah.



TUNKAR CHANGVAWN

Tin, intihsiaknahte chuan a bei talh talh apiang chu engkimah an insum thin a ni. Anni zawngin lallukhum chhe thei an hmu turin an bei a, keini erawh chuan lallukhum chhe thei lo hmu turin. Chutichuan tiamchin lam panin ka tlan ngat ngat a ni. *1 Kor 9:25-26*

Editorial Board

Editor:	R Lalringheta	9862358337
Joint Editor :	Lalchhandama	9862358347
	J Lalnangliana	9862399658
News Editor :	Thangkhum	9862303135
	Lalchuanmawia	9862580558
	K Lalremtuanga	9862119608
Cir. Manager :	Jacob Lalrinsanga	9612319779
Production Manager :	RL Thanhmuna	9436152760

Branch Office Bearer

President	<i>C Lalarliana</i>	9436142049
Vice President	<i>K Darthantluanga</i>	9436196071
Secretary	<i>Zairemmawia</i>	9862385654
Asst. Secretary	<i>RL Thanhnuna</i>	9436152760
Treasurer	<i>R. Lalhmachhuana</i>	9436151817
Fin. Secretary	<i>Lalrinliana</i>	9862581814
Adviser-te :	<i>Pu F Zosanga</i>	9436142106
	<i>Pu A Biaklawma</i>	9436363169
	<i>Pu Lalrengpuia Sailo</i>	9862075614

Editorial :

Sawiselna ringawt hian mihring hi a siam tha ber lem lova, fakna hian min tiphurin min tichak zawk ve fo bawk tih hriain fak phute chu fak i hreh lo ang u. Mi dang sawisel fotute hi a fel ber leh a tidik ber an ni kher lo bawk.

Tunlaiin kan vengin kawng hrang hrangah intihsiakna hmachhawn turin kan inbuatsaih mek a, veng mipuite fuihna leh fakna hian kawngro a su tih hriain kan veng hmalakna lamah rilru i pe deuh deuh ang u.

CWFC chu vanduai thlak takin an intihsiakna kal mek atangin an lo tawp ta a, kan player-te inpekna a fakawmin veng mipuite tawiamna pawh a ropui khawp mai. Kan chak lohna hi insiamthat nan hmang ngei se, hmasawn zel turin veng mipuite'n an beisei tlat a ni.

Section bila hnam lam intihsiak kan zo leh ta. Hei hi CM Trophy atana inbuat saihna chauh a ni tih hria ila, Branch hminga theihtawp chhuah zel turin Lammi zawng zawngte'n rilru i siam ang u. Section chauhah hian kan thahnemngaihna hi tawp mai lovin, kal zel tur kan ni tih hriat a tha khawp mai.

Zaipawl lamin zan hunawl nei hman lo lekin hla an lo zir ve mek bawk a. An inpekna a hlu khawp mai. Tin, sum leh pai leh ei leh ina tanpui thintute hnathawh hi fak loh chi rual a ni lo.

Kan zavaia tanrualna hi malsawmna kan dawna tur kawng a ni tih hre thar leh ila, inphatsana ral khat atanga insawisel mai lovin i infinchhuah zel ang u.

Article

Thlaa thil dum khi

*- Lalnunthara Sailo***Kamkeu nan Tuizem leh Vanapa Run**

Pu Chatea leh Pa Zova Tuizem khawr kha choka chhungah an uluk hle a, tlai lama an khawr zawh hnu chuan an thleka an nui leh ruh ruh thin a, tuizem nge kan vuakthiah dawn kawngkhar tih kha an ngaihtuah zui ta a. Hetiang deuh hian Pu H. Vanlalvena leh Sawma V & ZCC-te chuan Vanapa Section trela in tur an sa dun a, an sak zawh meuh chuan an dah tur ber hi inchi 4.5-in a leng lo va an nawr lut thei lo. Tunah hian two wheeler dah nan an hmang ta mai mai.

Thlahleinga zan theihngihlil

Thla han tih hian thenkhat rilru-ah chuan 'thlahleinga zan' tih a lo lang a, lunglen an tum nghal ringawt zel. Tunlai chuan eng (electric) kan nei tha a, inchhung lumah TV kan en heuh heuha, chuti a nih loh pawhin facebook, internet kan luhchilh a, hetiang khawvelah hi chuan Thlate chu lo bialin lo eng ruih mah se engteh-ual-ah kan ngai ta lo. Thlahleinga zante chu kan theihngihlil rem rum tawh mai.

Thla-a thil dum khi kan pi leh pute chuan bung niin an hria. Pu C Lalarliana erawh chuan Ui khuahkhirh loh niin a ngai a, Pu F Zosanga pawhin Ar khuahkhirh loh niin a hria. Pu C Lalmuankima erawh chuan hnatlang kohna tawtawrawt emaw ti a, Tv. Zaita ve thung chuan YMA Logo emaw a ti. Tunlai bikah hi chuan Pu Mahera chuan tonic solfa inziak tlar emaw pawh lo ti se, Tv Masangte-an Mangheta nula rim tur kal zan zan lai ni tlatin ngai se a mawh lo ve, thla bial lawma tingtang nena khaw laia zai vawng vawng an tlem tawh em hi maw !

Heti ringawt hi a ni thei chiah lo

Tun hi hman a la chang dawn. Rei lote emaw kan tih laiin 'Panlai nau rual leng zawngte kha, hmanah cho ui rim nam maw,....' tih hla YMA chhangin kan zir that that laite kha han sawi ila kum 27 liam ta a lo ni daih tawh.

Chanmari YMA Games-ah Chawngbawla section pakhatna anni han ti ila tuna T leh K section inbelhkhawm hun lai kan sawi tihna a lo ni a. Pu T Bualzika, Chanmari Branch YMA President a nih lai han sawi tel bawk ila, kum 27 vel liam ta a lo ni daih tawh a, Chanmarians kan sem zak zak laite pawh a rei ve ta hle mai.

Hetianga thil rei tawh han ngaihtuah hian mihring hi lunglenna eng emaw tak hian a rawn luhchilh nghal vat thin. Thlahleingate pawh hi ngaihtuah lem loh chang awm mah se ngaihtuah hun a lo inher chhuak lo thei lo.

Kan sawi ta sa sa, Zawlchhak in sawi teh ang aw

Zawlchhak han tih ringawt hian Primary school naupangin pathum hmun an sawi rual dial dial lai bengah a lo ri a. Zawlchhak hi a hun lai chuan Gladiator ni tura mipa naupangte inchherna hmun pawimawh ber a ni.

Aia upaten 'chala chil inhnawm hmasa sa' an tih avanga insual ta hi engzat tak awm ang maw ? Insualna hmun chauh a la ni lo cheu; playground pawimawh tawpkhawk a ni tel tlat ! Ball, cheng hnih man ke lawnga petna, insakawrchungchuanna, inkawibahna, zuan san leh zuan thua inelna, tuaingawt leh rawmung inbakkaih tirna hmun,... eu ! sawi vek lohin a fiah zawk thei dawn tlat mai !

Pu Lalkunga sikul kawt leh a sira zawl changpha lote tan khan zawlchhak kha a va hlu em ! Incho deuhten insual tura an in hrilhin 'banah zawlchhakah kan insual ang' tih kha an sawi tel ngei ngei a ni.

E he! Thlan-in pawh sawi tel a ngai tlat mai

Thlan in chung a lawn theih kha kan chak thei hle. Mahnia thlan in chung a kan han lawn ve theih meuh kha chuan thlan in chung atang khan a hnuuia awmte kha thil lei turin kan tir kan tir a, an hnial ngam ngai lo.

Aw, kha thlan in kha tawng thei ngat se chuan puan tur a va han ngah dawn tak em ! A thenin ruahsur laiin tawm hul nan an hmang a, a thenin sikul tlanbo nan, a thenin meizial zuk ruk nan, a thenin ganja zuk ruk nan, a thenin ruih nghah harh nan, a thenin ngaihzawngte tawmpui nan, a thenin inngahkhawm nan. Thlan In kha tawng thei ngat se chuan a ka hup chak an tam ngawt ang.

Thelret huan leh sekhupthur

A huho deuhin a ruikin thelret sawk turin kan lut ru a, thosi tam dan chu namenlo tak a ni thin. Theiria a rah lai a nih chuan a tla kan chhara kan eisen huam thin. Thelret kha a saksi a, nilenga kan thial pawhin a nem thei si lo, nem thlap thial nuam tak ni tur khan ni engzat nge kan thial thin pawh ka

(Phek 4-naah chhunzawm)

Chawngbawla Section

- ☐ Kawipuaia zun in siam chu zawh fel tep tawh a ni a, a kawngkhar tur tha tak mai Pu Lalnghinglova Pachuau in a pe a, a chungah an lawm hle.
- ☐ Section hnam lam intihsiaknaah consolation prize an dawng a, thahnemngai taka member leh hruaitu thawkchhuak zawng zawngte chungah an lawm hle. Lam zir chhunga ei leh in tum saktu zawng zawngte leh a siamtu te, zan rei tak thleng, bengchheng taka an zir lai pawh a ning lo va, tuartu thenawm khawveng te, eng an mamawh ang tum saktu Pu C. Lalarliana te leh lam tura thawkchhuak zawng zawngte chungah lawmthu an sawi.
- ☐ Chawngbawla Run (Section bungraw in) chhunga pipe kal tlang chu sawn a ni tawh a, hemi atan a an hmanrua leh bungruate phal taka hman tirtu Pu Lalrammawia (Tetea) JE PHE leh a thawhpuite chungah lawmthu an sawi.
- ☐ Tunkar hun remchangah section committee thut tum a ni.
- ☐ Pi Remtei W/o Pu Zoramthara Civil Hospital-a awm mek chu dam taka a lo chhuah leh thuai an duhsak hle.

Khuangchera Section

- ☐ Ni 9.8.2013 (Zirtawp) khan YMA Run thuam thain nileng hnatlang hruaituten an nei a. Hnatlanga thawk chhuak zawng zawng chungah lawmthu an sawi.
- ☐ H/No. Plate an zuar chhuak mek a. Chhungtinte tlawmngaia lo khul sak theuh turin an inngen.
- ☐ Tunkar chhung khan hnam lam tuang taka zir thin a ni a. Lam te in tur tum saktu Dr. David Malsawmkima leh sawhchiar siam saktute - Pu H.Lalhruaia, Pu F. Rosiamliana, Pi Zohmingthangi w/o K. Lalengmawia (L) leh Pu Lalchhanhima te chungah lawmthu an sawi. Tin, Pu Nundanga te chhungkuain lam nana phal taka an in an hmantir bakah a tul anga eitur an siam sak thin avangin an lawm hle.
- ☐ Chhungtin hnena Silver Jubilee Fund khawntute a rang lama mahni bial chan theuh khawn fel thuai turin an inhriattir.
- ☐ Section Wise hnam lam intihsiaika lawmman pakhatna an dawng chu an lawm tak zet a. Pakhatna an nih theihna tura thahnemngai taka lam zawng zawngte, tha leh zung, sum leh pai sengtu zawng zawngte chungah lawmthu an sawi tak zet.

Neuva Section

- ☐ Tunkar hun remchangah Committee koh tum ani.
- ☐ Lam intihsiaknaa tel member zawng zawngte chungah lawmthu an sawi a, a zirtirtu Pu V.Lalrinpuia, Tv R. Lalhmuchhuaka (V-Sec) leh Ni R.Zonunmawii te chungah Committee chuan lawmthu a sawi tak meuh a ni. Member lam intihsiakna a tel zawng zawng te CM Running Trophy a lam theuh turin an in ngen bawk.
- ☐ Lam zir lai a Ei/ in tur leh Pawisa fai a tanpuina petu Pu Lalrinliana, Pu Lalliansangpuia, Pu Lalchhandama, Pu HVL Zasanga, Pu Lalthanhrila, Pu Lalbiakzuala, Pu Vanlalhluta, Pu Ramthanpuia, leh Tv Lalhriatkima te chungah lawmthu an sawi.
- ☐ An hruaitu Pu HVL Zasanga zin pawh dam takin a lo haw leh ta.
- ☐ Silver Jubilee thawhlawm, chhungtin hnenah khawn mek a ni a, Chhung tinte a rang thei ang ber a pe fel thuai turin an in ngen.
- ☐ Vawiin tlai dar 3 hian hruaitute Pasaltha Neuva Inah innghak khawmin Duty tur a ni.

Taitesena Section

- ☐ Section wise lam a lam zawng zawngte chungah lawmthu an sawi a, tin, nu leh pa ten kan fate phal taka lam zir an phal thin vangin lawmthu an sawi tak meuh bawk a ni.
- ☐ Pu Lalzirliana te chhungkaw in an fapa Lalbiakdika(L)hriatreng nan section in a tul apianga an hman atan Ampilfier thar an pek avangin lawmthu an sawi tak meuh a ni.
- ☐ Pi Lalengvari te chhungkua in an fapa David Zohmingthanga hriatreng nan Mithi Signboard thar an pek avangin lawmthu an sawi tak meuh a ni.
- ☐ Pu Lianvela te chhungkua in an tupa Timothe Lalhmangaihzuuala hriatreng nan Kuang Stand thar an pek avangin lawmthu an sawi bawk a ni
- ☐ Lam zir nan a hmun hma tha tak min hmantirtu Indoor Stadium Management Committee te chungah lawmthu an sawi bawk
- ☐ Karleh hun remchang hmasa ber ah Faina hnatlang neih tum a ni a, memberte leh hruaitute an in hriattir lawk a ni.
- ☐ Ni 10.8.2013 (Inrinni) khan WEL-COME signboard an tar thar.

**VANLALMUANIKUM-74****VANAPA SECTION**

Pu Thenphunga leh Pi Nupuii te fa pali zinga a naupang ber niin, kum 1939-ah Luangmualah a piang. Pi Muani hi naupangte



a nihlain a pain a boralsan a, a nu enkawlina hnuai seilianin kum 1958-ah Pu Lalrinthanga nen ineiin fapa 3 leh hmeichhia 3 an nei a, tu 15 leh tuchhuan 9 a nei bawk. Pi Muani hi nu tha tak, inchhungkhur nu nih tling tak a ni a, Ni 30, Aug 2002-a a pasalin a boralsan hnuah pawh a tu leh fate leh chhungkhat lainate huikhawm thiam tak a ni a, hrisel lo tak chungin Kohhran leh khawtlangah a theih tawkin a inhmang ve thin. Kum 2001 atangin zunthlum leh thisen sang a nei tan a, kumin chho hian a natna hi a zual in a chak lo khawp mai. Ni 2.8.2013 (Zirtawp) a a tupa boralna avanga a tuka thlanthutnaah inlengte hnena lawmthu sawi a a ding zo chiah chu nikhawhrelavin a awm zui a, Ni 29.8.2013 (Inrinni) ah a boral.

Vanapa Section

- ☐ Pu H. Lalrinthanga damlo a dam leh thuai an duhsak.
- ☐ Lam zir nana in hman tirtu Pu C. Lalnunmawia te chhung leh current hman tirtu Pi Lalmawii te chhungkaw chungah lawmthu an sawi.
- ☐ Footpath siam zawh tawh a ni a, sum leh tha, bungrua hman tirtu zawng zawngte chungah lawmthu an sawi.
- ☐ Dekchi lian tha tak mai lei thar a ni a, Guwahati atanga phur hawn saktu Pu Lalbiakmawia(BMA 'CH') chungah lawmthu an sawi.
- ☐ Hun leh tha tam tak senga lam zirtu zawng zawngte chungah lawmthu an sawi.
- ☐ Lam zirna atana pawisa petu Pu C. Lalnunmawia - Rs 500, Pu Rohmingthanga - Rs 200, Pu H. Lalremruata - Rs 100 te chungah lawmthu an sawi.
- ☐ Jubilee budget Rs 10000.00 chu tlak fel a ni ta.
- ☐ Annie Zothansangi karlehah phai a inentir tumin an kal dawn a, dam taka a lo haw leh thuai an duhsak a, Pi Dengchungnungi damlo pawh a dam leh thuai an duh sak hle.

LOCAL COUNCIL

☐ Khua a lo fur ta a, chhungtinte kan tuichhe paihna uluk taka enkawl turin an ngenin an inhriattir.

☐ Kan veng chhunga pianphunga rualbanlote Chairman/Secretary hnena in report turin an ngen.

☐ Hun remchang hmasa berah vengchhunga NGO OB zawng zawngte nen meeting neih tur a ni a. Hun remchang lo insiam hram turin an ngen.

☐ Ui leh Ar khauh zawka khuahkhirh zel a ni a. Veng mipuite tawiamna an ngen nawn leh.

Thlanmual Sub-committee

☐ Ni 9.8.2013 (Inrinni) zing khan Thlanmual sub-Committee te chuan bungrua enfel hnatlang leh Thlanmual samfai hnatlang an nei a, member thahnem tak an thawh chhuah theih avangin an lawm hle.

CWSC VOLLEYBALL

☐ 2nd Division Tournament ah Junior Team te kar kalta khan tel a ni a, 2-0 a Bungkawn hneh in, 2-1 in ITI leh Armed Veng South te an hnehlo ve ve.

☐ Player-te inthlahdah lova, tan la thar deuh deuh turin an inchah.

CWSC TABLE TENNIS

☐ Chawnpui TT Club invitation ah tel a ni a, CWSC aiawh in Dr David Malsawmkima, Lalnunsanga, Vanlalremliana te an tel.

INHLAWHNA HLAWK

Sunday chanchinbu Zalen Agent/Semtu duh a ni

A lak man thla khat-ah ₹ 40/- (Sunday vawinga pawh nise) zingkar chauh sem.

Hlawh : Copy 1-ah ₹ 10/- kan pe.

Copy - 100-ah ₹ 1000/- (With Bonus)

Copy - 200-ah ₹ 2000/- (With Bonus)

Mi rinawmte tan a sem theih a, sum hnar tha tak a ni.

Branch/Section/Group - YMA/KTP/SAY/PYD leh mimal tam takin inhlawh nan hmangin, an hlawkpui mek a ni.

Contact - 2318226/9862363559
Biaksanga Building, New Avenue, Treasury Square (2-1)

CWSC FOOTBALL

☐ Independence Day Tournament-ah ningani khan Aizawl Football Club nen Quarter Final-ah an inkhel a, hun pangngai-ah 0-0 niin tie break, penalty petah 3-1 in an vanduai. Vengchhung mipui team thlawpa tantute chungah CWSC in lawmthu a sawi tak meuh meuh a ni.

☐ Tournament khelch chhunga sum leh paia tanpuite chungah leh lirthei hmantirtute chungah lawmthu an sawi.

☐ Naktuk zing dar 6:30 hian 3rd Div player register zawng zawng te High School Field-ah kal vek tur a ni.

☐ Football Club T Shirt zawrh chhuah mek a ni a, lo lei sak tu te zawng zawng chungah CWSC in lawmthu a sawi a, lo leisak zel turin an in ngen bawk.

BADMINTON


☐ Ni 15.8.2013 hian One Day Tournament an buatsaih dawn a, tel tumte chu Secretary hnenah inpek tur a ni e.

☐ Player-te taima taka practise zel turin an inchah.

☐ Inkhel thinte dimdawi taka Indoor Stadium hmang turin an inchah.

☐ Player-te Monthly fee ngai pawimawh turin an inchah.

Lemchan thawnthu ngaihnam leh tha tak mai 'LALTHANGLIANA' J. Lalnangliana ziah a lo chhuak ta. Synod bookroom- leh a ziaktu hnenah lei theihin a awm e, a man ₹ 70/-



(Phek 2 - article zawmna...)

hre tawh lo, a chang chuan tuilumah te kan chiah thin.

Thelret huan kawr kamah hian sekhupthur a awm thin a, a thur tui thei vawt vawt hle. Kawrupuiah hian silaimu kan chhar zeuh zeuh a, a fing deuhin thi-ah siamin intithe feih an awrh thin.

Pamchung Veng, Thlanmual mawng (Tlabirh) leh Pu J-a Veng

Pu J-a veng, Pamchung Veng leh tlabirh tih vel kha veng thler sawi dan pakhat a ni a. Pu J-a veng leh thlanmual mawng (Tlabirh) lama miten Vanapa section lama mipa naupangte kha 'Pamchung Veng' an tih khum vaih chuan insual a ngai deuh ziah. Leimin veng an tih erawh chuan inmelh rumin a inthathen theih.

Pamchung veng lamin tlabirh an tih vaih chuan hnek nghal dawt a ni mai a, thlanmual mawng hle tih erawh chuan inmelhrum deuh hlekin a inthathen theih bawk. Pu J-a veng lam hian veng hmingah huatthu an nei lo, theihai erawh an nei thei hle.

Tuna Hruaia (VL) pate in bawr vel khu Theihai huan an ti thin thanin ka hria. Khu lai khu hmang thiam fe fe pawh an tam ta ve ang, keini veng lu lam chuan kan hriatpui ve chiah lo nachungin rinna chak vak lo tan pawh nula leh tlangvalin chawlhi tlaia len vel nan an hmang ngei ang tih hi rinhle theih a ni lo ti raw, RT. Ruahsur cherh cherh hnuai-ah rizai sin thanin ngaihtuah chhunzawm ila a fiah zawk awm a sin.

PEM

1. Pu Lalrinchhana (Itana) te chung member 2, Pu Saihnuna Sailo te in V-Sect. atangin Upper Republic-ah.
2. Pu Vanlalhriata Fanai te chung member 3, Pu Thangseia in V-Sect. atangin Bethlehem Vengthlangah.
3. Pi Lalnunmawii te chung member 2, Pi Lalziki in T-Sect. atangin Durtlangah.
4. Pi Thanzami, Pu Vanlalruata in V-Sect. atangin Dintharah.
5. Neihchuilovi te chung member 3, Pu Thangvunga in K-Section atangin Champhai Kanan-ah.

**Aizawl Drug Store
Vaivakawn**

Doctor specialist (general surgeon) rawn duh tan, thawhtanni atanga inrinni thlengin zing dar 7 atangin inentir theih a ni. (2-1)